



Aqqalu C.Jerimiassen  
Atassut

UPA 2023/61 - 1  
4. maj 2023

**Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piumasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq. Inatsisissamik piareersaasiarluni suliaqarnerup peqatigisaanik, Kalaallit Nunaanni inuiaqatigiinnut akuusitsilersitsinissamik inatsimmik atulersitsinissaq pillugu Naalagaaffeqatigiinni oqartussaasunut Naalakkersuisut saaffiginnissuteqassapput.**

(Inatsisartunut ilaasortaq Agathe Fontain, Inuit Ataqtigiit)

Nunasinermi nunangilikkamut nalimmassartoqartalernissaanik inooriaatsitsinnullu paasinissimassusermik peqartoqartariaqalernera maanna piffissaalluarsorinarpoq, tassami maanna ukiut suliffissaaleqiffioqisut oqaluttuaannanngorsimalerput.

Illuanilli ullumikkut nalaatarput tassaavoq, assaat sulisinnaasut naammatsissinnaanngilagut imaaliallaannarluta. Suliffeqarfimmik assersuutingalugu sanaartormik suliaqartuni nutaamik namminersortumik aallartittoqartillugu, allatut ajornartumik allaniit sulereersunik tiguisarneq takornartaanngilaq.

Qanorluunniillu ajoriniartigingaluarutigu pitikkusunngitsigingaluarutsiguluunniit, nassuerutigisariaqarparput, assaat sulisinnaasut amingaatigaagut sumiiffippaalussuarni.

Maannamami takusalereerparput, ingasammik aalisakkerinermik suliaqarnerup iluani, sulisussanik amingaateqartuarneq allatut ajornartumik iliuuseqarfigineqartoq avataaniit suliartortitaqarnikkut.

Ila taannaannaanngearlumi, maanna unnuisarfinni allaat iggavimmiuniit inilerisut ilanngullugit amingaateqarneq annertusangaarmat kangianeersunit tikisitsisarneq takornartaajunnaavissimavoq.

Tamannalu appariartorunnangitsoq takorloorneqarsinnaavoq piffissami aggersumi, tassami ilinniangaqassutsikkut qaffariartoreruttaaq malittaani, suliffiit nalinginnaasunik taaneqarsinnaasut imaaliinnarlugit inuttalerniarneri unammillernarneruleralluttuinnartussaasoq naatsorsuutigisariaqarparput.

Inoqqortussutsikkummi isiginiassagaanni, nunaarannguatut naatsorsuussassaavugut inukeqigatta. Siunissamullu takornariaqarnikkut allatigullu inuussutissarsiornikkut siuarsaanissaq isigissagaanni,



suliffiit inuttalertariaqakkatta avataaneersunit inuttalerneqartarnissaaq avaqqukkuminaanneruleraluttuinnartussaasoq takorlooruminarmat.

Amerliartuinnarnerisalu malittaanitaq, taamannak maanna siunnersuuteqarneq piffissaagallartillugu suleqatigiiffisariaqaripput, Atassummiit isumaqarpuguttaaq.

Akulerutsitsilluassaguttalu, illuanittaaq aamma uagut eqqarsaatigilluagassatta ilagilluarpaat, nammineq inuiaqatigiittut allamiunut tikilluaqqusineramik pissuseqarnissarput, suliffissanik tiguaaniarpalaartutut naqissuserniarsareqinagit qanorli suleqatigilluartariaqarnerinik eqqarsariuseqalernissarput.

Takornartaanngeqaaq nunarsuup sinnerani, avataaniit suliertortunut nunasinermit politikkeqarneq erseqqarissunik.

Naak uagut nunasisarnermit allatigullu suliertortoqartarneranut oqartussaaffiit suli tigunngikkaluarigut, naalagaaffimmi nunasisarnermit oqartussa qarfiat qanimut pitsaanerusumik nunatsinnut ingerlaqqittussanut aaqqiivigisariaqaripputtaaq pingaartuuvoq.

Mittarfissuimmi aqaguanguinnangorput naammassinissaat, sulisoqarnikkullu nalimmattumik inissisimalissagutta, avataaneersut qanoq aqunniartariaqarnerinik, qanorlu akulerutsilluartariaqarnerinik periuseqartariaqarpugut.

Suliaq angisinnaavoq, aallartiffeqartariaqarpugulli. Nunasisut uatsitulli inuugamik, tikilluaqquneqarneq ulluinnarnilu nunannersumik inooqataaneq paasisinnaasariaqarpat. Imaassanngilarmi, tikiseriarlugit teqqumut igiinnarlugit sulisussaannartut pissagigut. Taamaassaguttami Qatar-ikkunniit Dubai-ikkunniillu pitsaanerujunnanginnatta avataaniit suliertortunut pissusilersuutitsigut.

Aap, inuiannut allanut nunarsuarmioqataanitta aqqani nalimmassartuartariaqarpugut sorpassuartigut, illuanilli aamma nunatsinnut pisut avataaniit suliertortut nalimmassartissinnaanissaat piffissaalluarpoq.

Atassummiit siunnersuummut qujalluta, Inuussutissarsiornermit Aatsitassanullu ataatsimiitsitalia-  
mut innersuupparput.